

Schwarz-Schilling: Angažman građana stvara pomake



Bosna i Hercegovina će uspjeti jer pojedinci i grupe pojedinaca na raznorazne načine djeluju u svojim oblastima kako bi se situacija unaprijedila, napisao je visoki predstavnik i specijalni predstavnik EU Christian Schwarz-Schilling danas u svojoj sedmičnoj novinskoj kolumni.

“Često dobre stvari koje ovi ljudi urade ostanu neprimjećene”, dodao je. “Oni uglavnom djeluju ispod političkog i medijskog radara. Ipak, u školama i bolnicama, u tvornicama i pozorištima i poslovnim subjektima i domovima širom zemlje, ovi ljudi rade kako bi došlo do postepenih pozitivnih promjena.”

U članku koji je objavljen danas u *Dnevnom avazu*, *Nezavisnim novinama* i *Večernjem listu*, Schwarz-Schilling je naglasio da u skoro svim slučajevima gdje su načinjeni pomaci tokom njegovog 17-mjesečnog mandata “za te pomake treba zahvaliti odgovornom i konstruktivnom angažmanu građana. Oni koji se angažuju djelima a ne retorikom, postižu praktične rezultate.” On je istaknuo kako je taj napredak bio daleko više primjetan na općinskom nivou.

Schwarz-Schilling je naglasio da je dijalog koji je gradio sa širokim krugom građana tokom njegovog mandata održao njegovu vjeru u budućnost zemlje.

“Sretna je okolnost da dijalog nisam ograničio samo na političke aktere, s obzirom da je zbog vremena koje su političari proveli u vođenju predizborne kampanje i formiranju organa vlasti ostalo svega nekoliko mjeseci tokom kojih je bilo moguće rješavati konkretna pitanja,” napisao je. “Ako bi imao oproštajnu poruku, ona bi bila slijedeća: pomaci će biti

ostvareni jedino onda kada političari prestanu da poziraju i u duhu istinskog dijaloga počnu slušati mišljenja drugih.”

Schwarz-Schilling je izrazio zadovoljstvo činjenicom da je mogao “krenuti putem za koji vjerujem da će ovoj zemlji, gledajući na duži rok, donijeti koristi,” no s druge strane je izrazio žaljenje “što nije bilo moguće ostvariti onoliko pomaka koliko sam se nadao.”

On je naglasio slijedeće: “Na početku svog mandata, rekao sam da rješenja za izazove sa kojima se suočava Bosna i Hercegovina neće doći od visokog predstavnika ili međunarodne zajednice nego iz Bosne i Hercegovine, i ja i dalje vjerujem da je ovo istina.”

Dodao je, međutim, da tek kada je otkrio kakva je stvarna situacija postalo je jasno da je potrebno učiniti još mnogo toga prije nego što Bosna i Hercegovina bude spremna da preuzme odgovornost za svoju budućnost.

Schwarz-Schilling je istaknuo da postoje ohrabrujući pokazatelji da se sve više građana aktivno angažuje na rješavanju socijalnih i političkih pitanja, te da također postoje pozitivni znakovi da nova ekonomija počinje da stvara nova radna mjesta, ali je naglasio da je potrebno učiniti još više kako bi se razvilo “civilno društvo koje može pozivati političare na odgovornost za njihova djela.”

Tekst [sedmične kolumne](#) visokog predstavnika/specijalnog predstavnika EU dostupan je u cjelosti na www.ohr.int i www.eusrbih.org.